

律



漫塘文集卷之三十二

宋籍與隆差通判建康府太常寺丞直顯謨閣管書觀漫塘初劉學著

墓誌銘

墓表

壙銘

故寧國通判朝奉趙大夫墓誌銘

君諱時佐字宜仲宜皇帝九世孫曾祖公偁故左  
朝請大夫直秘閣瀘南安撫累贈正奉大夫祖彥  
恂故左朝奉大夫南外知宗贈太中大夫父亮夫  
故朝議大夫祥符縣開國男累贈通議大夫正奉  
嘗宰金壇通議前夫人褚氏又金壇望族故奠居



馬君生而警敏遇事疏通慶元丁巳通議遇大禮  
該恩補將仕郎以漕舉免銓授迪功郎和州含山  
尉甫書初考丁所生母沈氏憂次任江州彭澤丞  
丞職水利及同令長勸課農桑君皆精意行之不  
爲具文遂爲郡守絜齋表先生所知首以改官親  
民薦自是薦者陸續秩滿辟監慶元府三石橋酒  
庫廉確自持課以溢額舉者及格改宣教郎知潭  
之益陽益陽湖外劇邑君決滯訟去淫祠境內肅  
然俄丁外艱服闋知江陵之石首縣縣之藕陂市

商賈所聚鬪訟煩多有鄭光國者自爲長雄官不  
敢詰會有發其事者君旣逮問得實卽諭之諸臺  
黥隸其人而籍其家由是遠近稱快其後臺府論  
薦多述其能鋤姦去惡蓋昉於此石首地狹民無  
宿藏君率邑人儲粟以備貴糴糴本不足捐俸以  
助之秩滿通判婺州經總制額惟婺爲重故時七  
邑之吏追逮旁午而虧額彌甚君至旣與之約盡  
置宿負而謹常程吏知不可欺程督不勞而課入  
有裕時軍事孔棘一日部符下郡期以兼旬招武



勇之士三千二百官吏愕眙莫知所爲亟以屬君  
君召募有方不勞而集人以爲艱終更造朝時多  
俸門或道以所從入曰賄至州可得也君曰郡守  
民之師帥顧以貨取得乎謝不往竟授寧國府通  
判而歸旣歸且知太夫人將還自康廬卽治圃所  
居之南鑿池築堂以爲娛侍之地堂成方日奉板  
輿從容其間一日出自浴室奄忽傾逝蓋其平日  
性地坦夷無有崎嶇故數盡而行無復畱難時實  
紹定癸丑十一月二十六日得年五十有三妻松

江同里葉氏封宜人三子若琮丙子監舉以覃恩  
補官今從事郎臨江軍新淦縣主簿若璫以君遇  
明堂恩補將仕郎若琨將受君遺澤二女長適儒  
林郎興國軍司戶沈鑄次適進士胡申之葬用端  
平二年十有二月丁酉實金壇邑南夏墟之原銘  
曰明敏斯才過則刻急寬柔斯德過乃不立君才  
之敏而行之恕君德之柔而剛不吐位惟通守年  
不中壽天實無知人乎何有夏墟之原土地肥美  
宜爾子孫旣多壽祉



高與之墓誌銘

君諱天賜字與之世居建康府句容縣來蘇鄉之咸和里曾祖遷祖士明皆不仕父志崇將仕郎將仕以好事行義推於鄉鄉人化之無乖爭凌犯之俗故因其所居之里號曰咸和居士居士二子篤意教之雅不欲累以事而家日大事日殷君嘗戚然不自安一日讀易至蠱慨然曰吾父以一身任戶門之責而吾兄弟皆安然自肆於方冊間得無乖幹蠱之義乎因屬其第一意於學而以服勤子

職爲已任居士勤儉起家旣生計稍裕常推已之有餘以濟人之不及有以緩急告靡不應而求者多應者亦日難又分有戚踈情有厚薄有不可一視而槩施者君皆有以劑量其宜而密請於居士居士復中持衡焉故予者不偏而得者意無不慊歲饑發粟以惠利其鄉準此由句曲道京口山石學确而行艱右比抵丁角鎮澗谷幽深而涉者病居士欲夷其險而甃之石跨其深而爲之梁最其費萬有三千緡聞者縮頸居士曰吾旣已許吾邦



之人矣可使有諾責乎君曰吾既已受命於吾父  
矣可使有析薪不荷之譏乎卽早夜以思沐雨櫛  
風之不憚曾未幾時而二大府之間岩壑高下皆  
成坦途行道之人無不舉首加額君娶陳氏生二  
子長元龜待補國學生次元龍皆疊疊向學五女  
唯第四女以疾餘皆有歸劉汝遇成之順陳宗振  
江壽彭其壻君氣貌魁梧曾次明白素康強無疾  
乃端平乙未八月二十日奄忽而逝得年四十有  
二居士未老而喪良子宜有所不堪然能以理遣  
謂死者歸復於土命也久畱何益卽以其年十有  
二月某日命元龜等葬君所居之西小陂塘之原  
余仲子君婿也故爲之銘銘曰昂昂乎其德履之  
充也溫溫乎其子職之恭也偃然而卧痛苦不及  
知者疾之無忌也窅然而逝叫號莫挽者數之有  
終也銘以昭之貽無窮也

故監江陵府糧料院諸葛承直墓誌銘

淳熙己亥庚子間我先君雲茅居士授徒於金壇  
之河下遠近之士聞風而來戶外屨滿惟丹陽諸



葛君爲高第君諱埴字子直世居邑之大華以儒學傳家曾祖參祖軾父汝賢皆不仕其族之賓興於鄉擢第於太常者相望故君年雖長猶奉親命而來時我先君僦屋爲書會隘不可容故來學之士寢食多散寓他處君與其族日就盥頰及造膳於逆旅主人之館而寢食必歸於書會夜非三鼓不寢辰起蓬首垢面而叩逆旅天未明已整冠肅容而至以爲常一時里巷及往來人伺之熟皆相與敬歎吾先君亦愛且奇之而賦予數奇乃紹熙

壬子方登名天府晚歲特奏名方授惠州文學換授迪功郎安豐軍安豐縣主簿中間累更大需循承直郎蓋七選之首階安豐極邊壯縣時方多事縣宰更易不時君屢攝邑備著賢勞旣滿數請解罷而郡守制帥知其能惜其去畱不遣迄成四考乃歸旣歸調江陵府糧料院未上而卒方未之官時以族黨困於里役之紛爭首倡義役迄今二十餘年紛爭之端息輯睦之風成人咸德之君生於紹興丙子沒於端平乙未享年八十娶朱氏歿葬所



居之西北小華之原乃以沒之年十有二月壬寅  
合葬男曰烈女適進士張信臣蚤卒孫男廷剛廷  
蘭廷玉廷辰孫女長適進士劉棠季未行烈以君  
吾先君弟子故請銘銘曰學不苟行不疚行年八  
十天予壽啟厥後大且久

江進士墓誌銘

端平丙申歲未盡一月金陵貢士江良甫奉其親  
命將以明年春二月丙午葬其兄君範於所居溧  
水縣吳岡之原前事迹君範素履來請曰遂良少

不敏伯氏與之共學又擇四方之有師法者使從  
之游時吾家窶甚內而二親菽水之奉外而遂良  
資糧靡履之費皆君範力貧爲之又闢故居新之  
使賓祭有所則君範之爲人子若兄抑可以無愧  
矣晚歲方期相與享期願致色養而君範逝矣平  
生嘗謂君言不妄微君與爲銘將無以慰終鮮之  
懷願毋以病屬筆他人某與君範無一日雅而姪  
孫宗朝在良甫子婿列可得辭乎君諱模君範字  
也生於淳熙戊申迄於卒之歲得年四十有八嘗



由鄉舉上名太學會祖之迪祖溥皆隱父南一以  
壽明太后壽恩補迪功郎致仕母蔡氏封孺人娶  
邢氏無子良甫與求儒家子爲繼命之曰貴承銘  
曰親之寧弟之成銘以昭之貴厥承

故監行在北酒庫張宣教墓誌銘

古者家有塾黨有庠術有序師友之益相望弦誦  
之聲相聞孝弟忠信之風以成垂爭陵犯之俗不  
作世道不古士始無所乎學近時州縣學官又往  
往不飭教事雖有秀民良子弟聞見寡陋亦無以

成其器質之美若吾鄉之楊氏張氏皆傾家貲以  
來當世士凡士之有聲場屋者雖在數千里外必  
羅致館下使與諸子及鄉之後進游聚書之富致  
客之盛遇客之厚悉時所罕見蓋不但家塾之教  
立而譽髦斯士猶足髣髴乎黨庠術序之盛楊氏  
自提舶君諱樗年字茂良始嘗築堂曰寶經因號  
經堂先生張氏自文學君諱損字德久始嘗闢齋  
曰省齋因號省齋先生余時往來郡校或爲貧假  
館不克在弟子列亦時時登門竊聽議論之餘預



觀禮文之懿而有得焉然後知庠序之教不可廢  
而二先生之有大造於吾鄉也張君四子余幸後  
死已銘其三其季端衡與余齊年又余兄恭靖先  
生之子用厚實君之婿則親且厚孰如余者銘可  
辭乎君諱汝拜字端衡曾大父恪崇寧間舉八行  
科終朝請郎賜緋魚袋累贈中奉大夫大父體仁  
故從議郎監明州鹽場父省齋舉進士廷試入丙  
科勅授吉州文學未及仕而卒四子皆以儒學自  
奮汝永終建康府溧陽丞汝仝再舉於鄉得年不

永汝玉終平江府嘉定簿兄弟皆稟姿粹和與人  
交篤厚而周緻君紹熙壬子慶元戊午兩與計偕  
嘉定庚辰廷試入等授迪功郎建康府句容尉金  
陵帥府尊嚴時大帥余公嶸體貌尤崇重小官到  
任有經旬不得見者惟君謁入卽見且欲留賓幕  
下君辭以入仕之初更事未深未幾又欲以關陞  
狀屬君復辭以未有實歷時奔競成俗凡影纓而  
仕者惟幸上官一日之知以廣聲勢雖年侵耄耄  
口尚乳臭寧知引辭君以六十之老九品微官而



能退讓如此人以為難句容邑計不裕尉俸尤薄君故大家至君再世篤志儒業生理漸廢人有諷以在官之日當為後日計者君笑不答惟以句容去家近薪水外皆可仰之家為便既至凡日用所須道路輦致不絕今兩邑之間居民猶能言之秩滿會浙東茶鹽使者以四明穿山鹽場課入厚而積弊多知君之在句容以廉著即以見次辟上君至一以廉自律亭戶歌舞之其去也航海追送有號泣不忍別者既歸而宦情已薄故過闕不謁選

而歸而知君者憐其貧且老無以為終老計復言於當路以行在北酒庫利權之重為提領所諸庫最俾復以見次辟君然非志也故遲遲其行簡書之迫黽勉就道到任未幾卒蓋事與心違故如此聞者悼之君制行和平不為崖異而抑邪守正自其本心有卓然不可及者茅山玉晨觀自唐有老君祠旁位夫子像鞠躬俯僂蓋擬當時問禮之事而為之君以為吾夫子千萬世仁義禮樂之宗主豈應作此屈折之像以惑觀聽即具其事白府改



作祀於別殿人以爲宜又句容縣驛相傳以爲神實據之士大夫有入居者輒得疾死以此無敢入者君謂吾嘗尉此矣使吾爲尉時得罪於民縱不入此固死不可辭或幸無罪神雖欲置之死得乎甫入而病人爲君危之君曰吾固安之若命矣命可辭乎已而疾瘳人服其守君兄弟平居孝弟纖悉曲盡自省齋下世念母夫人之獨居歲時令節游行賞玩惟意所適甘旨芳鮮惟力是視雖歲用度不贍不計也君以端平二年十月十有七日卒

得年七十有一娶宜興余氏熙寧大魁中之曾孫女女一人適免省進士劉用厚子一人案先君三日卒察卒而君之命嗣未定聚族而謀無有昭穆相當者謂情親而義正無如劉氏衆曰然卽以用厚之從姪更名曰燁爲案繼張氏先壠在金壇縣大亭之原君無急時得地於其仄曰胡家坂架庵植松示不别卜燁等敬遵治命葬用嘉熙元年八月二十有四日銘曰邦國之望南張北楊收書滿架延客殊方車馬送迎山川相望師道之立于家



于鄉染教養和昆令季強粹德至行從容有常既  
狹厥施宜壽而昌嗚呼端衡鈴也則亡南鄉之原  
水秀山長君所自擇可安而藏啟佑後人有永其  
光

墓誌

章泉趙先生墓表

粵自炎祚中興文物萃於東南厥初諸老先生師  
友淵源有以繫學者之望天下學者翕然而景從  
之閩湘江浙師道並建凡異時孔孟之所傳周程

張邵之所講思之益精語之益詳炳然斯文萬世  
攸賴比年天不憖遺諸老淪謝文獻之家典刑之  
彥巋然獨存猶有以繫學者之望者章泉先生一  
人而已故先生雖退然不敢以師道自任而天下  
學者凡有一介之善片文隻字之長皆裹糧負笈  
就正函丈其限以地屈於力而不能至者詩筒書  
函左右旁午徃徃以一酬酢爲榮及先生之沒而  
文獻典刑盡矣後生晚進欲求師友之益而俛俛  
然無所之矣可不爲大哀乎先生姓趙氏諱蕃字



昌父其先自杭徙汴由汴而鄭南渡居信之玉山  
曾祖暘朝散大夫直龍圖閣提舉江州太平觀祖  
澤迪功郎海州朐山縣主簿贈承議郎父渙奉議  
郎通判沅州贈朝奉郎龍圖歿葬玉山之章泉先  
生因家焉故世號章泉先生用龍圖致仕恩入仕  
饒之浮梁尉福之連江簿皆不赴爲吉之太和簿  
辰之司理參軍最後監衡之安仁贍軍酒庫已至  
未上而歸遂奉祠家居積祠庭之考至三十有三  
今天子御極之元年歲在乙酉宰相以先生名聞

有旨除大社令三辭不拜特改奉議郎直秘閣主  
管建昌軍仙都觀又三辭不允越三年差主管華  
州雲臺觀蓋先生自乙酉至是歲辭官不獲屢上  
休致之請皆不允而先生請不已明年夏四月始  
得旨轉承議郎依前直秘閣致仕又閱月而先生  
逝矣實紹定某年某月某日壽八十有七方先生  
之在太和便座有齋榜曰思隱蓋當筮仕之初已  
有山林之思在官清苦惟以賦詠自娛以是受知  
於吉之鄉先生楊公萬里贈詩有云西昌主簿如



禪僧日食秋菊嚼春冰又云勸渠未要思舊隱且  
與西昌作好春其所以行之身加乎民者畧可想  
見又爲理椽辨獄之誣不爲二千石屈卒見是於  
當路權酷位下特以少嘗從靜春先生劉公清之  
受學公時守衡故欲從之卒業甫至而劉以非罪  
去卽從之歸其謹於所職而篤於所事如此賦性  
寬平與人樂易而剛介亦不可奪故相周公必大  
與先生有州里之舊先生亦有不可寄詩有公如  
在廊廟我亦遂簞瓢之句其後公在相位屢加薦

引先生竟不受自少喜作詩答書亦或以詩代援  
筆立成不經意而平淡有趣讀者以爲有陶靖節  
之風歲時賓友聚會尊酒從容浩歌長吟心融意  
適見者又以爲有浴沂詠歸氣象至於年垂知命  
自視歔然更往受學於文公朱先生旣耄矣猶虞  
末路之難命所居曰難齋則眡昔賢啟足啓手而  
戰戰兢兢年踰九十而求箴傲於其國無異心也  
其能續諸老先生之後爲學者所歸豈偶然哉娶  
俞氏繼邢氏子五人遂遠遙遠遺遙遠先卒女四



其婿俞椅周杲徐耘老徐禧孫男七人曾孫男六人皆好學葬用卒之年九月甲申地實永豐縣富城鄉之葉塢距章泉五里前葬學者爲詩爲文以誦歎先生之美者不可勝計其爲誄其爲銘又有名公巨卿在某寒鄉晚出於先生無能爲役而遂以七十翁不遠二千里來致先生垂沒之贈且謂某昔叨誤恩實玷先生後不應泊然忘言無以昭令德某義不得辭則姑取門人鄭夢協所狀先生行益以已所聞使歸表於先生墓上

繼室安人梁氏墓誌

梁氏居處之麗水君之曾祖固皇任文林郎贈光祿大夫妣普安郡夫人何氏祖汝嘉皇任寶文閣學士宣奉大夫縉雲郡開國公贈少師妣魏國夫人葉氏父季秘皇任中大夫守尚書吏部侍郎麗水縣開國子贈正議大夫母太碩人吳氏君生而溫柔長而明慧吳夫人雖高簡不屑家務侍郎雅尚清潔左右無當其意者歲時賓祭細大必親比君長始克有托吳夫人嘗曰使吾得婦如吾女可



無憾侍郎亦惜君之不爲丈夫子也筭而擇配處  
多貴胄爭委禽焉吳夫人問所志皆不對細問之  
曰吾視諸貴豪子怙勢以凌物植貨以自豐寧能  
有遠志無歸寒士耳侍郎聞而異之光州代還余  
調儀真法曹余友張敏則嗣古時須掌故次皆留  
中都侍郎數與敏則會公卿間屬以擇婿敏則謂  
無以易余余時喪陶氏婦甫三歲痛未艾辭屢矣  
敏則言益力且道君所以辭婚於鄉里者若有具  
契於心亦會先君書來責以不亟娶無以承宗祀

遂定議時歲在丙辰明年春成婚便道之官儀真  
俸廩皆脫粟由椽屬以上例責之倉吏俾易精鑿  
余不可斗糴以奉親與家人糲食君乍去膏粱卽  
甘之時孫氏妹已嫁未行君一日出白金及他首  
飾授余曰以助奩中物先君駭曰寒士嫁女寧須  
爾耶命反其半君不可孫氏妹後嘗一再歸君輒  
更其服飾之舊者而益其所無下及女隸皆然余  
固未始問君亦不余告也先君間自儀真歸買田  
於金壇書來言曰非是無以奉粢盛然財不可苟



得汝宜自量不及勿彊也余方締思無策君聞而笑曰是獨不可謀諸婦乎吾雖無贏惟是盤盂酸棗帘幕以事宴樂者非君家所急願成翁志卽舉而鬻於市後九年余忍死終先君喪凡家之見產悉以分兄弟或謂在儀真時所置產良家盍少畱以自奉余亦意君之未能忘也遲之君聞而歎曰是區區者所有幾何且君猶可仕或伯叔不給將何仰乎因盡棄不畱余兄少負不羈之才投筆從軍以是獲戾於先君絕不復歸因納婦軍中時惟

一女二子余官江寧時已歸其長子旣至儀真盡取其次子以歸君拊之如子衣服皆手自縫紉女長嫁之如已女及侍郎來總軍饗兄猶未去赤籍先君旣棄諸孤余始奉兄嫂以歸妯娌相見衆難其處君曰長幼有序惟是不可亂卽趨就下繼是徃來如一日情義有加焉故君之喪嫂氏哭之尤哀余先婦陶氏與君齊年賢而夭余每與君誦其人未嘗不欷歔流涕器用有存者君謹視之忌日必躬飭祀事盛服奠餽如婦事姑余旣佐浙東幕



意有所不愜將告歸及奉旨堂審將以疾辭惟家  
人之難於忘貧也皆私從君卜可否君曰是豈謀  
及婦人者哉繼自今君當賣劍買牛吾當力蠶繅  
紡績爾自是絕肉食去華飾有饋者及餽餘惟以  
飫兒女曰吾厭是久矣歲時令節邑人繁會歌吹  
喧闐君闔門不出曰吾閱是多矣雖余亦病其固  
也而彊之對曰君盍自念出處何如或家人一朝  
不堪澹泊君可復求仕乎余愧其言梁氏故奉佛  
君之來猶私以像設自隨時若有所諷誦余旣與

論釋老之害道及鬼神之實理恍然若有悟自是  
遂絕在越及溫所僦居皆他人所不能居者余中  
間奔走在外君獨與兒女居安之如家君中年得  
血疾遇夏輒發余以所居之隘疑爲熱所乘乃戊  
寅春勉強結廬是歲夏入新居甫一年而君病復  
作自秋而冬遂不可療旣革顧謂左右曰吾自知  
疾不復起惟是女長而未解事重之以疾不見其  
嫁所生男皆童穉不及見其成立吾母復在遠不  
及與之訣用爲大恨抑所自慰者君嘗與我論鬼



神之禮以爲世俗之說皆大謬吾有味其言乃今  
不幸久疾濱死數矣無幾微有爽於聞君君言其  
信吾死其天乎言訖而沒嗚呼痛哉君之病也女  
子先得病疾足不能行旣再歲矣以爲君憂及君  
之沒倉皇奔哭若未始有疾者自是復常嗚呼是  
殆造物者憐君之賢而不壽以是慰君在天之靈  
歟君生之歲乾道庚寅六月朔其沒也實嘉定己  
卯十二月癸未以明年八月壬申葬於金壇縣西  
五十里薛村桃花山西原

故馬帥周防禦壙誌

侯周姓諱虎字叔子七世祖敬述國初工部侍郎  
贈開府儀同三司世家臨淮靖康之亂南徙於蘇  
曾祖稹朝奉郎通判廣州祖恕鄉貢進士父宗禮  
贈武略大夫母何氏太安人以侯和州城守功特  
封感義郡太夫人進封永國太夫人與侯俱廟祀  
於和侯性倜儻加之學問自其微時輕財而尚氣  
節別業在琴川族大而分亟請受分謝不往曰丈  
夫富貴當自致寧計此故鄉里服其義部使者嘉



漢城文集卷之三十一  
嘆不足至爲詩美之以~~爲~~文武大分勲業不大  
競故棄已成之業而就~~有~~科慶元丙辰擢第爲天  
下第一授秉義郎殿前副護聖步軍第一將同正  
將在軍七年於~~或~~益習嘉泰二年春除武學諭  
九月除閣門舍人三年八月借均州觀察使知閣  
門事兼客省四方館事充金國賀生辰接送伴副  
使四年三月知光州時朝廷密議規恢而邊郡猶  
狃和好城壁不葺緩急不可恃軍民雜居防禁不  
可施侯補城之闕凡二百有三十六丈增樓櫓十

有七所而城守始嚴建寨屋千餘間榜曰柳營以  
自別於民居而軍政始肅連帥上其功增秩一等  
擢知楚州前政以時方進取過於逢迎拘客舟籍  
驢馬而道路怨嗟拘運夫籍芻藁而室家忿嘆侯  
皆縱遣而與運夫爲期期至輒會無違者招撫使  
嫉其異已罷去隨見直於宣司起知和州實開禧  
二年秋時虜已會諸道兵加其大帥以平南盪江  
等號使長驅入寇期以自廬而和乃十有一月辛  
卯至廬越翼日卽棄廬趨和以掩我不備聲言合



肥已破四十萬衆至矣時城之所恃者兵而馬帥戚拱前期率所部絕江去畱兵僅千八百有六人合城中見兵通不盈四千所冀者援而制司爲馬帥及戎司所誤已下令退保所倚者民心而父老垂泣叩馬歷道向來失守事以爲地當衿要虜志必取毋爲守死孤城侯謂兵無衆寡顧所用何如惟民心不可以不固因語父老曰父老所以勉吾去以圖生也然所欲有甚於生者吾國家守臣一朝去此則爲奔亡之人失節敗名爲父老羞生不

如死效死弗去雖死猶生況不必死乎且人孰不愛其母若子者今吾惟一子奉九十歲之母於此若縱悖繆不能爲父老計獨不思爲老母弱子計乎父老思之吾計決矣衆因感泣相與收涕言曰願效死由是申飭攸司各共乃事而部分將兵乘城大兵少則一人兼三人之任甲午圍城丁酉進攻城上撫機輒應使彼智不得施而此矢不虛發越十有七日合戰凡三十有四殺虜驍將以十數最後射中其大帥石矻礮乃諸帥中最號鷲勇者



虜氣沮甚引去行至僊宗死虜以大劄幸我之和而江淮奠枕矣策勲進秩三等論者以爲未稱明年四月特轉武功大夫嘉定改元始正任文州刺史七月除主管侍衛馬軍行司公事二年以措置繳納逃亡事故官兵付身革濫恩數多特授成州團練使四年閏二月除侍衛馬軍都虞侯五年五月除帶御器械兼幹辦皇城司以太夫人年益高丐養益力除提舉佑神觀未幾丁太夫人憂尋謫居徽州八年十一月得旨自便十年四月叙復元

官自是召命再頒除知和州者一特轉行一官者再遜牘率再三上多者或至八九必得請乃已咸爲傲將軍歌以諷之侯曰非傲也誠也傳曰功成者去詩曰旣明且哲以保其身侯之旨遠矣紹定二年正月侯於是年六十有九疾且殆上章告老復得旨轉行一官致仕命未下以是月二十有八日卒於正寢官自秉義郎十轉而至和州防禦使爵自臨淮縣開國男三進封而至郡侯妻張氏先三十年卒贈令人男女各一人女未笄卒於楚男



良貴忠訓郎孫曰闔孫未命侯文詞敏贍落筆若不經意而深於運思者或愧之作大字端勁獨步當世某與侯無一日雅惟定交書尺中去年冬書來言吾且逝矣平生所交文人勝士彫喪略盡子雖不文強爲我書出處大致立墓上某以侯自爲塋及庀葬具於十七載之前疑其蚤計教此欲辭未暇也而侯真逝矣良貴將以其年十有一月二十日奉治命葬侯於常熟縣崑山之陽前期以壙誌請某旣至及辭於侯之生前其忍辭於身後惟侯功在社稷澤在江淮宜有狀其事上太史氏考姑述出處大致納諸壙以實侯前言云

故提舉宗丞朝散楊大夫壙誌

公諱恕字可久世居丹徒之埤城曾祖智圓故贈從義郎祖子存故任訓武郎累贈中散大夫父樗年故任朝請大夫提舉廣東市舶累贈通議大夫公以明經三貢於鄉慶元丁巳以世賞補將仕郎銓試中上等授迪功郎以賞三循資至承直郎用舉者改通直郎七轉終朝散大夫初任監錢塘縣



買納鹽場知新城縣改秩知嘉興之華亭未上改  
嚴之淳安入朝監三省樞密院門遷大府寺簿通  
判慶元府權知湖州改臨江軍秩滿除大宗正除  
權提舉淮南東路常平茶鹽司公事病免至管建  
康府崇禧觀以疾卒於京口寓舍實寶慶元年六  
月二十有四日享年六十有四夫人趙氏先公二  
年卒二子克已立已皆將仕郎克已銓試中程而  
未注闕女適從政郎蕭山縣丞趙佐夫孫一人尚  
幼初公葬趙夫人于丹陽縣仁信鄉經山之原實  
船使墓側克已立已卽以公沒之年十有二月丙  
午奉公喪合葬云

故宣義郎致仕陶公壙誌

公諱士達字仲和居嘉興之柳澤以紹興丁巳生  
嘉定壬申卒遇壽恩郊恩各一明堂恩再積封至  
宣義郎二子皆擢進士科大章儒林郎新監行在  
車輅院門大甄新安慶府府學教授孫男子泳子  
沂子淵皆習進士業曾孫容寔崇皆幼夫人沈氏  
先公卒十七年葬於柳澤之西二里乃合葬焉實



公卒之歲十一月辛酉得銘於前秘書省正字周南刻未竟大章大甄屬公季婿丹陽劉某書而納諸壙

表清卿妻邵氏壙誌

洮湖之陽有隱君子焉曰表君字清卿有田二頃歲課僮隸力耕以給公上而食其餘並舍種花植竹畜雙鶴其間每放屨出門鶴飛舞前導平湖浩渺遠岫低昂若展畫圖而去鳥來帆與漁歌樵唱皆足供耳目之玩旣習次灑然一塵不侵故發爲

詩文皆有雅致與余先君雲茅居士善常言吾所以有生之樂而無生之累者繫吾妻是賴君以慶元中卒四子汝賢汝舟汝礪汝楫前死余識其三人皆畏法而謹於事常言吾兄弟所以先後異出而無間言者惟吾母是恃蓋先君之得於其夫與余之得於六子者略相契則母之賢可知問其族曰邵氏鄱人故休寧知縣峙之女樞密張公燾之甥初鄉人亞魁許公必勝仕於鄱聘以爲子婦甫嫁而寡遂歸於隱君以織紉組紃爲女工以祭祀



賓客爲婦職朝夕服勤而加之以恭儉終老不懈  
諸子中惟季已出撫之不加厚諸子亦染教食和  
事之如一用能成其家寶慶改元正月二十五日  
以疾卒享年八十有二諸子十以卒之明年二月  
丁酉合葬之隱君之塋實金壇縣大雲鄉新繁之  
原前葬問禮於鄉先生前當塗王大夫而後行事  
以余投分頗厚且嘗有聞於先君俾書而納諸壙  
義不得辭

王居士壙誌

君諱光逢字慶會其先三衢人曾祖介與二蘇先  
生同中賢良科終尚書祠部郎中累贈少師祖渙  
之故寶文閣學士正議大夫太原郡開國侯贈開  
府儀同三司父楹故通直郎湖州德清縣丞賢良  
自衢徙潤故歐蘇及王文公有所與往還詩公十  
餘歲卽奉母來居金壇能簡靜自將與物無競家  
以日昌累試場屋不效杜門專於教子以紹定己  
丑正月癸未卒享年七十有七娶張氏繼黃氏皆  
名家女三子其仲曰淮老卒虎文景龍皆鄉貢進



士孫男二人尚幼其年九月壬申葬縣東五里師  
野漫塘叟爲誌其壙

故衡州判官莊承直壙誌

君諱松年字伯堅世居金壇曾祖義故贈朝議大  
夫祖必強擢進士第爲尚書右司郎官終朝散大  
夫父芑終朝奉大夫君朝奉次子性姿敏悟眉目  
秀整朝奉所鍾愛以遺澤入仕授饒州浮梁縣主  
簿丁母憂再授無爲軍無爲縣主簿秩滿爲岳陽  
軍節度判官人稱其能再調衡州軍士判官未上

乃端平元年八月二十有一日不疾而卒享年五  
十有六兩娶趙氏繼蔣氏皆名家女二子長潤不  
狃於習喜與寒峻交次澤尚幼以次年四月二十  
日葬邑之路莊實朝奉墓前丹陽劉某述

施俊卿墓碣

君諱世英字俊卿居句容曾祖璿祖道父涇皆有  
隱德淳熙錫類祖嘗授迪功郎君業進士病鄉舉  
員隘以助邊補將仕郎淮東總領聞其才俾攝承  
幕下檄至不就嘉定改元二月庚申以疾卒得年



四十有五配巫氏故簽書密院之曾孫弟惠與厚  
子宗旦宗儒將以其年十有二月壬午葬君於縣  
之來蘇鄉倪塘山之原列公行事以書求誌比三  
徃反不憚昔余先君與君有識面之舊先君之葬  
不遠百里來會余雖拙於文義不得辭君之行事  
如勸分則率先置產則增價平糴以惠鄉井甃道  
以便徃來貸緡錢族子而不責償給楛櫨流民而  
不受直余雖不能詳知然以君之志尚觀之其信  
而余之雅愛君者不在是也兄弟天倫擬於手足  
世衰道喪或疾視如仇讐尤於富家見之君蚤失  
怙恃終其世兄弟財不分今觀君拜疏籲天祈減  
已算以延伯兄之壽厚資送女不慕名閥而續女  
兄之好又欲廣室廬以聚居情義隱然使人愛嘆  
知世俗分財之議蓋君所不忍聞而尚忍行之推  
是心也以徃則君之進特未可量而遂止此可哀  
也已

雷翁墓碣

嘉定改元夏六月丁未金壇雷翁卒翌日余徃哭



其家或問曰哭之以其私歟曰非然也吾哀夫爲人子孫者之不克紹其先而於是翁有感也顧吾里多公卿大夫有一傳而爲農厥後浸微無以自別於鄉里者翁故邑人朝請公孫朝請諱豫世裔所不得詳或曰其先連州人擢皇祐五年進士第終福州通判祿弗及子子燦入太學爲諸生燦之卒也子彥強未壯不及學比長娶于吳繼室于潘翁吳氏出潘嬖已出斥遠之育於外兄王氏父卒而家益索里俗輕重視家有無無論其世者於是

戶籍夷爲編昨丘壟荒於樵牧翁顧念先世齋咨涕洟甫立其家卽護視丘壟恪恭時祀畱伯子自助而納其仲季於學脯脩之供惟謹仲季亦欽厥志仲再選於鄉爲待補太學生乃請於官正戶籍之久訛紹家聲於已墜里俗還舊觀矣顧非躓歟使是翁也而在顧不足以激昂當世之爲人子孫者歟是翁也而亡則余之哭之也顧獨以其私與問者謝曰吾固知子涕非無從也翁名震生於紹興壬子壽七十有七配施氏三子伯文仲遇應龍



季也女一人適故殿中丞孫姚模孫男六人諸孤奉母命將以八月甲子葬翁於縣東里干之原應龍妻余四從姪女也求文以誌余故得以余之所以哭翁者詳於石云

### 桂山君墓表

紹定改元春漫塘叟劉某與鄉之士會社倉有衣墨衰重趺而來者視其謁黃巖王濬叟以其地之遠來之勤也貌之臞色之慘也驚焉問故曰濬不勝道路之勞息未定願少間翌日奉其父桂山君

事狀一通來拜且泣曰吾故江左王氏永和中有葬吾邑之樓崎者子孫家焉事具赤城志桂山蓋摘招隱句自名非地也而名甚著蓋於其人吾父德粹無瑕韻雅無俗於書無所不讀文無長語詩有遠趣字用隸法尤工蚤歲從師友于外惟恐憂其親書歸必過爲好語始娶若有所不樂吾母問之曰兄弟同氣也而異姓間之能無愧乎吾母曰君母過戚吾當識之居喪盡禮旣除喪每歎奉親日短自奉日長有異饌必停食上丘壠泣涕久之



卮酒豆肉兄弟不借輒不下咽祭祀必合族飲餽使人人得盡其情孰弱弗支孰匱弗給皆先事料理不使至乏困築讀書堂於家之偏以來四方之士推食解衣無虛日蓋吾父之所以行之家者如此鄉隣以緩急告唯諾惟謹而尤重喪事其往必先其歸必後凡其所須不謁而獲荒政以拯民饑義役以寬民力良法具在而吏奉行不虔爲姦之府皆疏其宜使有位者罷行之民拜實惠濱海水易去來田多旱澇置閘以謹儲泄立莊以資繕修

其事始於淳熙間時吾父甫冠卽與一二儒先主之民於今受其利益吾父之施於鄉者如此夫惠利足以及人宜其必周於謀已而吾父異是家務委之幹力未嘗計盈縮當強仕之年棄科舉視軒冕如桎梏環所居皆佳山水每花開鳥啼有會于心卽命賓友從童冠杖屨出游升高望遠氣與天地同舒浩歌長嘯聲與崖谷相答觴至而飲飲而醉醉而濯清泉倚茂樹情與萬化俱釋其曠達有如此者丁亥三月上澣得疾猶坐小閣中檢校花



石焚香默坐望日忽戒守坐人汛掃示將別家下  
家始疑其有異已而命筆作國子博士周君子靜  
書屬以銘先墓既又書中庸論論馬少游語各一  
章及賦六詩授子若壻各因其才而勉之明日延  
見親黨言笑爲別更欲爲書別故人之在遠者諸  
子不可則授之辭而親題其後其他所書戒尚多  
結字益遒勁至暮濬問氣體何如曰如故語已而  
逝其之死不亂有如此者至若聞吾父之疾而人  
爲奔走家致禱禳聞吾父之沒而弔者相望巷哭

聲相聞審吾父之不復生而士相與祠於家之塾  
民相與祠於里之社則皆前所未有今將以九日  
某日葬吾父於鄉之靈泉山銘以藏謂幽博士周  
君旣哀而賜之矣表以揭諸外使過者曰此桂山  
墓也式之則豈惟不死吾父樵者遠牧者去吾子  
孫實嘉賴之是用茹苦銜哀冒重江涉畏塗以請  
子其賜之叟嘗病士大夫以經濟自詭而不適於  
用釋老之徒以超詣自許而無得於心固有坐廟  
朝而昧於舉措之宜終老山林而瞽亂於死生之



際者聞桂山君之風可以愧矣君諱木字伯奇曾  
祖佾故進武校尉祖剛故迪功郎父士寧故不仕  
配鄭氏力勤好禮以濟厥家四子汝澄濟汲濟累  
從海內知名士游詩文盡去陳言足爲後進式二  
女適陳密周端信孫男景山景彝女三人尚幼乾  
道丁亥二月二十有八日實君始生其卒也甲子  
一周羸二十有一日叟旣爲緒次其說復爲詩遺  
濟使併表於墓庶鄉之祠君者得歌之以爲送迎  
之章其辭曰靈之山兮幽幽遲夫君兮來游春蘭  
芬兮菊秋靈之泉兮泚泚君之來兮樂只酌匏尊  
兮薦芳芷明月上兮君歸樹掩冉兮風披披歸來  
歸來兮君毋遠而

先祖十九府君墓誌

紹興壬午十有一月四日先祖始卒於金壇先祖  
諱微字成德更諱杞少精記誦有聲場屋甫中年  
卽不屑事科舉常產僅自給會姻家湯氏爲子擇  
師得名士上饒王君須錢三千緡起家湯氏聚族  
而謀僅得六之五先祖時在座作而曰願奉五百



緡以幸教吾子衆皆愕謂力不讎退卽鬻常產五百緡先衆而具從弟有同居而酗酒者先祖一無所較密與祖妣謀遷居金壇以避之劉氏自滄徙潤世爲丹陽大族居處高明環而居者皆所隸旣遷金壇屋敝且隘間里情未浹欲壞甃支床亦不可得或咎其失先祖笑曰是非乃所知居數年二子益長朋游滋廣伯父連上名春官學成行尊士大夫起敬鼓篋從游者以百數今邑之報恩寺卽書院遺址先祖時時杖屨游處其間學徒望之肅

然得不言之教後先祖沒十有二年先君亦預歲貢先祖旣成其子尤力於教孫七人逮事者四曰金曰緝曰桂曰岳曰革金緝桂岳卽伯父誌祖妣墓時以小字著者不逮事者三曰宰曰寧曰達民今之存者三桂岳宰寧桂岳貢於鄉者五淳熙庚子癸卯皆爲舉首嘉定甲戌廷對第七人授登仕郎今從正郎新江陰軍司法參軍宰當淳熙丙午巳酉試於鄉亦再冒首選紹熙龍飛賜進士出身歷江寧尉真州司法泰興令開禧間入浙東幕病免



而桂岳之子用辰用厚皆再舉於鄉用辰爲癸酉  
舉首緝之子應龍亦與己卯舉餘曾孫十有六人  
皆業進士以未舉不書先祖精力強敏至老不衰  
舊居距金壇幾四十里遇淖躡屐往來少壯者亦  
歎其難享年七十有二卒之明年乃克合葬甫葬  
而伯父卒不及誌宰當己卯八月始克追書故不  
具云

壙銘

皇考雲茅居士朝奉壙銘

劉其姓景城裔蒙慶名茂先字生紹興直壬子終  
嘉泰癸亥歲貢禮部奉廷試官不及命也己嗣子  
宰遵遺志冬十月葬於此百世下尚勿毀

前室安人陶氏壙銘

嘉興陶氏令儀淑質歸於劉某三年而卒乾道庚  
寅始生之歲紹熙癸丑實維初逝又十寒暑爰宅  
於茲峯回氣藏成葬之宜其兆之偏同穴有待勒  
名於石告後千載

繼室安人梁氏壙銘



漫塘劉某繼室梁氏祖地官長父天官貳生乾道  
寅六月初吉終歲己卯未盡八日葬用庚辰仲秋  
月圓鄉曰游仙桃花西原

朱進士埋銘

金壇西郊厥惟西窻有偉朱君令名孔昭裔出閩  
山六世居此士聰諱也敏仲其字孝以事親敬以  
奉先臨財必公家無間言貧病死告必周其急聞  
義則徙如將不及拳拳教子曰惟師友余取余求  
弗靳厥有宜其有子再貢于鄉蘭玉階庭競秀齊  
芳七十五年兼福與壽漫塘銘之以詔永久

周氏埋銘

周在金壇著者國光有學有文以舉于鄉傳家惟  
女似漢中郎言歸于殷克共婦事順以從夫教子  
以義惟儉惟勤俾昌而熾乾道己丑始生之年辛  
巳歸葬梓墟之原鑽石有永其傳



漫塘文集卷之三十三

宋籍與歐陽通判建康府太常寺丞直顯謨閣主管玉局觀漫塘病叟劉聖著  
行狀

故吏部梁侍郎行狀

梁氏居處之麗水代有顯人至少師遇知高宗爲  
中興名臣公其幼子也諱季琰字飾父少孤自力  
於學以遺澤入仕奉祠秩滿授提點江淮坑冶鑄  
錢司幹辦公事省罷改授鄂州駐劄御前諸軍都  
統制司幹辦公事主帥號知名將深所器重欲上



章論薦公謝不受再調南外睦宗院一時同僚多名流皆樂與公交旣而通判湖州湖去京百里而近臺省監司之滯訟悉以委公公閱實其事不爲吏欺裁處其平不爲勢撓自本州以及旁郡事多賴公以直經制之入舊多乾沒當路之督責無已時公檢校靡密歲額整辦又斥其餘以補前政之虧數以萬計諸司列上其政孝廟亦雅聞公名有旨令都堂審察公素靖退力丐外補執政擬公它郡上親擢公信州識者知其邁召用矣會孝廟諒

闇旋遜大位公治信未暮亦以母夫人憂去遂弗果召公之護喪而歸也吏以例白郡故奠餽若干公斥去之僚吏復相率以請曰道遠將無以爲資公曰親喪乃所自盡也而可煩官乎竟辭弗納郡人嗟嘆服除知光州光迫虜境城守因陋公曰是非所以靖邊鄙亟請於朝更新之又增築羊馬墻以扞牧圉中更繹騷故壘猶存土人之隸於官者曰效用公親課其藝勸以醲賞皆爲精兵牧御有方千里帖泰治以最聞代還除提舉荆湖北路常



平茶鹽司公事湖外去朝廷遠常平往往侵移於  
它用公至嚴舊制多所補還復自湖北提舉江南  
西路常平茶鹽司公事江西之俗生子不能贍卽  
委棄不顧公創慈幼院以收育之且撥公田爲經  
久計多所全活臨川闕守公攝事數月寬猛適宜  
邦人至今稱之明年除江南東路提點刑獄公事  
俗喜終訟公獨懲其發蹤者訟以是簡歲舉所部  
吏率人士之望有爲言路姻家而仕不由其道者  
僥求百端予者徧當路公獨不予時以爲難尋除

都大提點江淮等路坑冶鑄錢司公事仍兼江東  
提刑居無何除淮南南路轉運判官兼淮東提刑淮  
東使客所由漕寄特重公擢自遠外莫識其由有  
間乃知權臣激於求者之越次特閱班簿取履歷  
深而績用著者畀之尋加直秘閣明年除尚書戶  
部郎中總領淮東軍馬錢糧總所以軍食爲重異  
時吏以貿易新陳借貸椿積爲辭雜塵土秕糠以  
爲姦利公曰椿積以備不虞何可屢借且吾調度  
有常和糴足以相濟何俟於借卽嚴綱運之程去



和之弊於是糧饟輻輳庾廩充盈以新易陳歲不能什一自餘悉以見至者給吏不得以借貸爲名有所雜揉軍人鼓舞以爲計其實增常時什二三時邊隙雖未開而兩淮已募新兵諸軍亦廣刺雄效所增衣糧不可勝計公雖屢請于朝而報不時下悉仰給總所不以匱聞京口歲旱責經賦於種菽之家民不堪命會公攝守不崇朝蠲去民權呼若更生朝廷旌使事之勤再轉爲太府卿而難其代凡四閱歲始召還爲中書門下省檢正諸房公

事位顧居卿下公芥蒂踰年而版曹缺官朝論以公九典饒事識財貨源流除權尚書戶部侍郎兼勅令所同詳定官時邊事方殷調度不繼公謂大絃急則小絃絕一切之政非所可用惟明統紀信期會爲庶幾自當時而言若甚迂緩而外不致張皇內不至乏絕時以爲難故事從官滿歲爲真公以不阿用事者之意越歲不遷更化甫旬決卽酌師言真除尚書吏部侍郎兼勅令所詳定官搢紳欣然以爲德選公感激奮厲知無不言以事關時



政不敢具載其論吏銓一疏畧曰恭惟國家南渡  
以來八十年間省部成法講若畫一昨自權臣當  
國變更略盡姑以目前所見言之改官必班見舊  
制也今或徑得差遣不妨趨班改官必作邑舊制  
也今或別得差遣遂免作邑至於班改之員已足  
特許附班薦舉之章有委曲收使或闕已授而  
留抄未上別圖改注或闕未出而先乞留闕阻遏  
後來或不合奏薦而特與放行旣開方來之門復  
令已往者援例或不許收而特與改玉旣使脫

去罪籍仍還積下磨勘辟差者不問實歷之有無  
換闕者不拘闕次之遠近甚至出身定於補官之  
初或扳援親屬而改授進士限以科舉之制或未  
嘗中選而出官若此等類不可槩舉乞詔中外自  
今一遵成法凡後來所行有與成法相戾者並不  
放行庶幾公道昭明人心歸一更化善治無先於  
此縉紳服其切要嘗謂家人曰士貴知止吾以平  
進爲天子從臣不啻足矣復何求乎乃嘉定元年  
夏四月抗疏請外溫詔弗許公志在得請章相繼



四上每不允詔下歸對家人誦前輩多少朱門鎖  
空屋主人元自不曾歸之句沉吟欵欵蓋新第落  
成公猶未及見也顧上眷深厚決去不可期以秋  
仲復伸前請會和好方成虜使到闕以公言論謹  
審威儀詳雅屬公館客客甫出關而公訃聞矣實  
九月二十有九日享年六十有六公初乞謝事有  
旨守尚書吏部侍郎致仕及遺奏上贈正議大夫  
官其後如格仍賜銀絹以賻公性清淨薄嗜慾年  
過七仕卽就外寢所至一室蕭然惟圖史是娛少

病脚弱晚更強健時服涼劑以疏壅底雖祁寒不  
挾纊屬纊之朝起居如平時盥頰訖事命左右啓  
窓仰天舉手三扣齒而逝著作佐郎楊公簡一世  
儒先不妄交友前公薨一日楊與同列語嘆曰吾  
未見約於自奉而誠於求去者同列以公對楊聳  
然起敬卽款門求見公亦往謝其門皆坐語移時  
翌旦楊會同列館中方道公志氣之充相與歎仰  
而凶問已至蓋公之精爽之死不變如此公兄十  
人其一同產兄卒姪猶未齒公教之成立遂貢於



鄉有子猶在齟齬於公爲從孫甫登從列卽以郊  
恩奏之雖已孫未官不恤也先是母夫人將葬而  
地未有定公謂其姪曰世俗以墓地吉凶占嗣續  
與替吾知喪吾親而已吉凶非所計汝其圖之姪  
得地於青田之回龍穴介數大松之間人力未易  
去一夕爲風雷所拔人以爲孝感異時使傳數更  
由遠而近政路有爲公地者或問其故則曰吾嘗  
官其鄉終始三年梁不以一毫私事托吾以是知  
之公兩典侯藩六將使指所至惜公帑纖悉無遺

用雖舊比所當得者率卻不受行部懼費供億不  
宿地市去官必籍內外供帳歸之有司毫髮不有  
在江西日有盜私帑白金器者衆懼公知私哀金  
置器以償公故弗問比去指而歸之曰爲盜者一  
人爾而償金者衆吾不忍也家之產業在官俸賜  
悉委僕御計簿來前惟摘紙尾視有無未嘗計出  
納有勸公屬子弟檢覈者公曰吾以清白遺子孫  
顧可以財累之其孝友之行潔廉之操寬厚之量  
大率類是自少爲文不屑人下再舉漕臺一居首



選詩語壯健不蹈故常字畫師米南宮雖局束書  
問問而邁往之氣間見墨筆之表配吳氏封令人  
三子曰鉞文林郎湖州歸安縣丞曰鑰從事郎饒  
州安仁縣主簿曰銖迪功郎新南康軍星子縣主  
簿女二人孫男五人曰渙曰澤曰沂曰汲曰浩公  
所官姪孫曰溱迪功郎新台州天台縣主簿某家  
丹陽距公居不啻千里公得姓名於士友間歸以  
長女其次適承務郎前湖州長興縣尉傅誠誠先  
公數月卒鉞等將以明年某月某日柩公喪回

山母夫人冢次前葬命某哀公言行以俟命於太  
史氏某列在子婿不得以狂斐辭謹緒次如右

### 錢賢良行述

公諱弼字聖俞吳越錢氏別裔也曾祖仲方祖京  
皆不仕父邦傑進武校尉妣鄒氏公少儻欲以  
功名自見念非場屋無以進刻意舉子業既壯得  
兵家韜鈴書說之晝夜覃思其間其書大要以歲  
運吉凶占主客勝負而天文地理律曆之說咸在  
紹興丙子就試京口郡守欲庇其鄉之士俾冒郡



籍以試來者數十郡人援貢舉制以爭不勝則期以試日逼入守知其謀親以兵衛擁入之郡人不勝忿羣起請張兵衛前卻守愧且怒因誣以犯上發卒大搜儒冠者輒執之至暮執者七人公其一也顧謂同執曰今日之事非七人之爲爲之者闔郡之人也雖然彼闔郡之人旣免矣而吾七人者以不幸執儻因吾七人者而遂究其餘則被禍不已多乎盍相與自執其咎守欲竟黨與煨鍊百計公等以身任竟不及其他會言者直其寃守以罪

去公等亦未減郡人德公而高其節辛巳逆亮犯淮士民震恐公獨昌言曰是德光稔惡之日也壬午其有帝羝之禍乎聞者疑之明年亮遇害何公侑一世竒士不妄交游時爲鎮江分司糧料院親聞公言遂定交大將劉錡重兵過京口公曰是行也必無功以書止之不從已而果然孝宗銳於恢復旁羅知兵之士乾道庚寅虞公允文當國上公所著鞞鈴之說有旨下中書陳進取之宜公建議乞乘明年辛卯王氣立儲副以奉太上公又說虞



公以延攬中原人物及要結東西二虜率見采用  
虞謂公當以大科進乃以先朝所立洞明韜略運  
籌決勝科薦未報而公以鄉舉試禮部會母喪歸  
淳熙甲午虜欲渝平以泛使先道路訥訥時使相  
曹公勛頗參國論私從公問卜公曰第無憂因上  
書言歲運不相克制虜必不能加我又今年凶運  
在冀州之分明年乙未福德至於吳楚與謝玄破  
苻堅之歲同虜或興師我受其福宜乘此大舉既  
而虜使之來果無他曹公因再以韜略科薦且上

公進卷上頗聞公名會虜謀既訕時論隨變公亦  
罷歸居鄉急於惠利比年郡蠲畸零之稅縣除私  
禁之害公有力焉公進卷既鋟板好事者家寶其  
書太守有見之者延致郡治欲復上其名於朝公  
以數竒倦游喟然曰曩主吾者皆近臣猶弗達况  
遠者乎卽辭去慶元己未以累舉恩授迪功郎鄂  
州蒲圻縣西尉兼新店尊湖市鎮煙火公事未上  
以嘉泰癸亥十二月二十有六日終於家明年四  
月丁酉葬于金壇之東伏塘村之原公輕財重義



勇於爲人而踈於謀已篤學老不衰內而教子外而教人一視無所偏厚聞人有過面責無所避學者嚴事之雖素慢易者遇公有加禮南游並海北盡兩淮古今勝踐多所經歷遇山川形勝及昔人戰伐之地輒徘徊不能去一觴一詠不忘當世如所賦延攬英雄行京江行牧馬行及長江五十韻皆慷慨激烈足以發其胸中之氣讀之者無問識不識想見其人娶鄒氏蓋母夫人之黨克飭家務子曰純曰績純四舉于鄉再爲舉首績亦與鄉舉

試入上庠冠本經選人以爲丙子陰德之報蓋未艾也女一人適進士丁游某晚進視公爲丈人行方公以身任丙子之事先公時在疚某後十年始生莫詳顛末總角見長老道所以已壯公爲人長從從見桂嵩學見其言童稚時困於貧先友契闊獨公一見哀其有志曰此吾鄉先生子也敢勤子至於他人乎遂留受業兄雖未幾以先公客西州往從之游然公之此意過人遠矣某以此益起敬公長先公一歲晚以純與某遊相得歡甚先公之



葬公力疾賦挽章且屬其季葬必臨穴某已襄大  
事往拜其門公延入臥內勞問生死其意悵悵未  
越月復過之則吊者在矣故某之哭公視它客爲  
尤哀純請狀公行某其何辭雖然公進卷之行於  
世者篇凡五十詩文之藏於家者尚多自足以不  
朽矣某何加焉抑公意不可忘純請不可孤也故  
茹哀泚筆書其略

陳府君行述

公諱嘉言字聖謨十一世祖法會唐末爲福州刺

史有子曰盛封潁川公始居建陽之考亭再世有  
徙居于閩者其後實生丞相文惠樞密文忠太尉  
康靖公六世有徙居于潤者則丞相秀國成肅公  
也丞相勲閩具載國史公五世祖大猷於丞相爲  
伯父生諫擢寶元元年進士第終光祿寺丞光祿  
生願是爲都曹公累贈中奉大夫都曹生禧是爲  
儀鸞公終朝散郎儀鸞生琳授迪功郎命下而卒  
迪功少慷慨以功名自任南渡初條福建槍仗手  
利害獻之韓蘄王世忠世忠言諸朝朝廷是其議



而嘉其有文因授之文資時軍務方殷求文武如  
不及人謂陳氏且大矣而竟弗仕聞者太息夫人  
宋氏相繼亦卒二子長曰雅言公其季也皆在孩  
穉方時搶攘弗克自存兄依從父往來真潤間公  
依鄭氏姑于信之大田因學于鄭氏克勤且敏旣  
壯感鵠原之義歛歔流涕問兄所舍徒步從之未  
幾擇配得故京西運判直閣姚公邵之次女兄弟  
生數年而離離十五年而復合妻子具而友愛不  
衰識者躋之嘗從容相謂曰丞相之後不大難

戶之責繫吾兄弟是賴吾兄弟之齒長矣假令入  
官何能脂韋以取世資盍相與教子苟有興者吾  
責塞矣由是罄家之有爲子求師諸子亦祇承厥  
志淳熙丁酉兄之子岫嶠貢于真長子暢亦以名  
上太學粵三歲公之二子應岍岍貢于潤應岍連  
三貢季子景周貢者再焉景周篤學有文貢名不  
下甲乙其至未可量淳熙中公兄尚亡恙每榜帖  
出輒交相賀曰吾兄弟孤苦流離不自意全乃今  
白首同居有子如此見先人於地下可無憾矣且



兄弟之子猶子也奚必吾子也哉嘉泰癸亥公蓋  
八帙矣子孫以公初度捧觴爲壽公舉觴曰吾數  
極陽九明年其殆乎家人恠之明年三月庚子以  
疾終人始信公陽九之說非苟然者應岍岍皆先  
公下世承其祀者景周女二人長適進士張持次  
已嫁而卒孫箠箕節初丞相之生也母荆國大夫  
人竇氏病弗能乳光祿夫人葉氏竇乳之丞相念  
乳母恩封葉夫人崇安郡太君又官其子若孫都  
曹儀鸞皆由此任故公之先與丞相雖從兄弟而

恩義視他族特厚丞相一傳而絕有旨命繼繼之  
者儀鸞之弟也又再傳而絕公念之會福建常平  
使者楊公潛因華亭族人之請牒公命繼公以昭  
穆計丞相之後於屬爲孫卽報曰吾已命箕矣或  
曰公之孫未衆也盍求之他公曰是非乃所知也  
昔之命繼也世祿可及也室廬可居而田疇可有  
也今亡矣且丞相時屋吾家吾有孫弗命而命它  
人人謂斯何竟以箕報公卒之次月景周得地於  
丹徒縣義里鄉五州山之麓實邇先塋將以六月



漢城文身卷之十四  
丁酉奉公喪以葬前葬一月俾某述公行某於景  
周兄弟也姓不同爾藉不以請猶將私自紀述况  
其請之勤乎始某年十六入鄉校時公兄子某已  
肄業于真惟公仲子在言重而色莊某心敬焉攷  
之鄉評則曰子見仲氏耳未見伯氏也它日遇伯  
氏於塗粹而文寬而制則加敬焉一日有正衣冠  
肅容儀而來者問姓名卽景周也因與之居視所  
以言所安毅然必欲爲古人所爲卓然不與世俗  
偶其敬且愛焉復念種德有源發祥有自非公之

賢不生此子乃訪公行事聞其初婚姚氏也得米  
麥百餘斛時兵荒翔貴勺合不私又聞其與兄寓  
貞之別墅也一夕水驟至家人走高岸偶遺仲姪  
時驚風怒濤瞬息萬狀兄嫂倉皇失措奴隸搏手  
無策公勇往不顧卒抱仲姪而還紹興辛巳避地  
金陵之石步時江北流人麇至仰食土人難之則  
操戈以起公挺身白刃間爲陳禍福仍盡已所有  
捐以予之流人退聽而土人亦相勸給食所全活  
甚衆族弟天麟自建陽携弟妹奉母以出傭于山



陽公聞而惻然亟走山陽脫其傭資其歸其母殯于中道凡喪死養生與異時男室女家費出公手此皆人所知其所聞者其不知者公不自言其亦不可得聞也慶元丙辰某始獲拜公堂下時公已七十餘聽聰視明神全氣充雖後生不及知公無所不學自養亦有道惜其無位以行志故施設不大見然由所聞言之輕財重義不顧已而恤人固足以使鄙者寬薄者厚矣况其臨事制變排難解紛又有過人者耶宜乎大書以昭後世而某方斬

然在衰經中志昏慮亂不足稱所委抑聞之萬石君之名因諸子而彰鄭君位下名微微鄭莊人誰知者傳曰立身揚名以顯父母景周方事此語某願學焉姑述所聞異時傳名臣者究世德之源流或於斯乎有攷

### 湯貢士行述

君諱願年字養正居丹陽之珥陵其先殷姓濮之鄆城人五季之亂自北而南避宣帝諱易殷爲湯元祐紹聖間有隱君子曰其實生正奉公某皇任



承議郎以長子東野任工部侍郎次子某官陞朝  
累贈正奉大夫又次子曰東明嚴重自將不事貨  
殖而家以富工部將官之辭弗受刻意教子凡所  
致皆海內名士子三人用是克有成立君其季也  
好讀書尤熟班氏史字畫效歐陽率更體毫髮不  
用已意初業詞賦兼經制下以書春秋游場屋俱  
有聲淳熙巳酉以詞賦貢名禮部嘉泰辛酉十月  
得疾後三年甲子科詔下君於是年六十有六矣  
病小愈猶鼓勇於前子姪或難之君曰吾深知得

失有命且旦莫死矣得亦於我何有但束髮受命  
先君俾從事於此一朝弃之是忘其先也其用志  
如此是歲七月四日乙丑屬其子備酒饌聚宗族  
劇飲盡歡明日與其子論古今事甫竟從容謂曰  
吾喪具已飭而一日二日可爲者容有未備汝趣  
爲之吾且逝矣其子視君病未大侵精爽如平時  
亟理藥餌未暇也至暮君又趣之曰秋暑猶熾吾  
慮汝之不及事也丁卯卒其子料理故書得君手  
澤預處家務甚悉知君於性命之理講之素矣豈



以死生倉卒之變動其心哉娶周氏故同知樞密院麟之之從妹卒五年而君繼之子曰淵愿而文允其親一話一言皆確守不渝女二人長適括蒼周介叔謹叔謹嘗從東萊呂先生晦庵朱先生學故君以女妻之且授之田欲使奠居叔謹客游且十年君弗芥蒂次女將適毗陵李氏未行而亡周夫人傷之以是屬疾孫二人曼老火老君爲人孝友篤實與人交言必有信訑訑之色不見於顏面誑言不出諸口內族外姻戚休均之從姪尊祖早

失所怙君育於家比其長也爲之娶婦婦與所生俱亡君爲之葬旣又憐其無子買妾予之今有子匍匐能言矣族大而貧者衆子弟從師或困於無資君代之給泗之楊君端民信之唐君康年爲宗族小學師二十年費多出於君俗重元日及冬夏至君慮宗族或無以祭饋之粟弗間戚疏惟其貧曰庶吾祖先之無餒且知粟之自出皆吾祖先之遺也外兄蔣師是無以自業君時尚少啓二兄捐姑蘇良田百畝畀之外兄卒而子益困衣食君家



十有四年教之謀生後將贖所質田歸之志未遂而歿姻黨有復先世所質產者君喜曰是家有子不負先業矣雖虧元直不計鄉隣有喪稱力調之不遺一人喜賓客至者如歸有求不之靳初君與二兄齊名鄉人稱之爲三君子長曰喬年字壽隆才高氣邁傲睨流俗爲文雅健尤長於詩秦丞相當國權勢張甚士子一登其門卽擢高科躋膺仕熟君名欲羅致館下君不爲屈天下士識不識聞其風而壯之乾道間何公備爲吏部郎故與君爲

同窻友君將以春秋試上舍何謂公某題若何公因爲道所以翼日何被命攷試君亟易它經淳熙甲午要路多知己議以學校前輩如君僅一二數將俾學官上其名於朝而官之君知而謝曰吾少事科舉誓不以微倖進若爾二十年前附秦丞相已爲中書舍人矣議者慙而止一日君自外入關故人子何公澹爲武學諭聞而喜亟以書戒食君弗啓緘還之語使者曰歸語而主吾而父執也知父執至而不來見欲折簡致之禮乎何聞而愧之



後終昭州推官次日脩年字壽真疾舉子浮華爲  
有用學登紹興甲戌進士第分教維揚帥守莫公  
奉詔經理民兵至數月數與幕府條便宜皆格不  
行壘書督責莫懼密延君問計君謝非職守所及  
莫曰闔府誰如君者急人之急君其無辭君不獲  
已條十事以獻莫讀之喜曰吾乃今知免於戾矣  
卽具以聞不十日報下今淮東民兵條畫多自君  
發之上復親灑宸翰以賜莫公褒其盡心莫雅德  
君君不以是自多後終廬州教授教授君先卒推

官君繼之及貢士君之卒也某將之京口道珥陵  
見其鄉之人與族黨交相吊曰昔教授君之歿也  
幸有推官君在及推官君之歿也人屬于貢士君  
者猶推官君也今亡矣繼自今以往善者何所勸  
惡者何所愧貧者誰食之才者孰成之故三君子  
雖均爲一鄉之望而人之哭貢士君也尤哀淵將  
以其年十月二十日巳酉合葬君于周夫人之兆  
實前吳村之原距所居三里前葬兩月疏君行事  
俾其緒次因附見推官君教授君出處大槩以終



友于之義以慰鄉人之思其惟衰宗世託姻婭方  
君之先館致名士伯父府君與先君子實承師于  
湯氏及君年長來學于伯父因與先君子締交五  
十年猶一日其罪大逆天禍延所怙疇昔之夜夢  
先君子如平生問所與游猶及君姓字則其情分  
可知矣况所䟽行事皆昔所聞於先君子者其讀  
之泫然流涕豈直親戚故舊之情而已哉謹緒次  
之以復于淵退而列于先友記云

### 楊提舉行述

新城令楊君恕既葬其父泣涕謂某曰恕苦塊殘  
生忍死以襄大事既遂事矣而銘文未勒將無以  
發幽光用悼痛于厥心以有謁于子子先公所厚  
盍爲我緒次之將藉手以于當世之文人某辭不  
獲敬列其事于左公諱樗年字茂良世居鎮江之  
丹徒曾祖京祖智圓贈從義郎父子存訓武郎以  
公貴贈中奉大夫母卯氏封太碩人公生七歲能  
詩十五精舉子業伯父文林公與一時名流孫公  
覲邵公彪孫公蓋蘇公庠游公以弱齡步趨其間



咸器重之唱酬靡不與時高廟稱壽顯仁皇太后  
公以布衣進蟠桃頌人服其藻麗吳越錢氏故太  
師駙馬都尉唐國公先葬于東霞山實邇公居錢  
氏之人稔公俊聲遂聯姻實少師瀘州軍節度使  
榮國公忱之曾孫女旣親迎少師竒之曰是當爲  
世用卽奏官初監行在草料場代更入兩浙運司  
幙浙運事叢爲諸道最多倚公裁決海舶之至四  
明運司應抽分奉命而往者與吏爲市公家之利  
浸耗公再被檄正已以率下歲入倍蓰使者德公

助比三政皆以京秩薦秩滿班見改宣教郎知常  
州武進縣未上下中奉公憂喪死事生率禮無違  
淳熙乙未京口大旱錢公良臣以總饗奏計得請  
浚湖以寓荒政時郡守沈公夔自將漕時賴公佐  
佑錢公已熟公名合辭請曰願以役累公公迫於  
知已且謂是役也利於鄉不敢以服爲解躬受比  
要均其稍食所全活飢民不可勝計而湖之利迄  
今役竟第功公謝不受除喪知秀州華亭縣華亭  
賦重加以歲飢民不堪命乃盡蠲賦入之無藝者



以私帑代輸縣承提點刑獄司檄繫強盜十餘實  
平民公得其情卽釋之吏請須報公曰民以盜繫  
少稽則生理蕩矣吾寧以故縱違戾毋寧使吾民  
之及此也境多黃雀醢之以媚貴要歲且百萬公  
至卽嚴采捕之禁其它如修學以養士開河以利  
農爲梁以濟涉徃徃縣計不足則以俸入繼之慈  
惠之政畢舉亦時厲威嚴以濟其偏逋逃之卒出  
沒海濱民被其擾公得其尤者斷手以令餘悉奔  
散戍期未盡一月使者過聽撫細故論罷邑人寃

之御史陳公賈諫議大夫謝公諤交章訟其事有  
旨擢通判揚州時楊帥錢公之望以地控要衝見  
兵寡弱警急非所恃始置強勇一軍事竟而廩給  
未定官吏徃反饋臺以十數率不得要領最後公  
徃定於一言歲旱蝗公親督捕蝗不爲災瓜洲饑  
道所經有閘一制河水之平前此具文整葺隨卽  
傾圮公親授規畫今猶適用錢以辦治聞公有力  
焉乃與部使者趙公師弄陳公損之上公政于朝  
旣受代以太碩人年高重於去鄉家食者累年當



國者識其意除知真州真澗一水相望千騎來迎  
奉板輿以行鄉里榮之淮民自和戎以來狃於寬  
政前守以內郡槩視頗失其初公至未浹日一二  
罷行切於利病人人感悅會太碩人之喪民惜公  
去走外臺借留日以千計服闋除知台州尋差主  
管建寧府武夷山冲佑觀居無何除提舉福建市  
舶公銳於告老罷復奉祀先是恕已官新城公就  
養甚適間苦脾疾忽命筆倣釋氏作頌末有六塵  
不染本來無撒手便行真自在之句恕雖驚幸公

神識不亂猶冀復初又十日果卒實開禧紀元十  
月丙辰享年七十有四官終朝議大夫葬用十有  
一月丙午地實丹陽縣經山松峯之西錢夫人塋  
之左遵治命也公容貌魁梧言動詳雅輕財重義  
少長一致三舉禮部不中第歎曰一命以上皆足  
行志寧以科目計耶遂弃舉業不務喜爲詩有清  
致尤謹尺牘無一語凡好古書名畫及他雅玩願  
售者爭歸之酬之必過其直或與已同好亦乞與  
不靳太碩人年益高公色養益謹歲遇誕日宗親



鄉黨遠近畢會冠蓋塞閭里太碩人好道家言前  
一月卽饌其徒比誕日且千人太碩人之喪公垂  
七十哀毀不廢楊氏族大公以禮率之且望必具  
衣冠集公家擊鮮醜酒長幼序坐從容竟日有急  
難者極力援之鄉鄰有善子弟厚爲之禮而懲其  
尤無良者由是風俗知勸四方士友款門求見靡  
不納納者衆而求者深故亦有缺望而去者公弗  
創艾益招徠之解衣推食汲汲弗暇處士陳君松  
年能詩有聲公一見哀其窮予之資授之館俾自

旁縣徙家月廩給之于今十有六年如一日脩職  
郎監南嶽廟洪君烈貧甚從公借宅以居母喪未  
葬憂不知所謂公問須錢幾何曰五萬公曰第無  
憂於我乎取迨日甫定則五萬錢在門矣其哀士  
之窮如此凡服役左右之人一以誠待不虞其欺  
有乾沒而去去而復來亦優容之其寬厚殆不可  
及錢夫人早世繼謝夫人上蔡之裔亦先卒皆贈  
宜人二子思其官次恕也公家居建寶經堂儲書  
萬卷擇良師友與二子居思先公亡恕三請鄉舉



再仕皆有能名二女長適某人次病廢孫男女四人曰均曰填曰壘皆幼女未行當世載文筆都儒林多公舊交恕又克世其家必有論譔其美以詔不朽者某鄉里晚生姑述所聞以附先友記云

### 孫府君行述

公諱大成字振道世丹徒大族曾祖德贈通奉大夫祖書開州文學父元方通奉游太學有聞于時會恩且拜官去不就六子皆爲太學生長卽文學次蓋次盍蓋以上舍解褐終淮南轉運判官文學

以特科進受勅二十年竟不出仕公性資簡淡而操行純篤自垂髫時非入學不忍頃刻違其親方其親在病公亦得疾藥餌必自以進雖疾甚不懈旣孤與兄大年弟大本及堂兄大中大聲奉祖母同居無間言祖母服除始議析居財物無所較大中與公所居室寄大聲受分之地歲酬賃地之直大聲旣沒其子貧不自勝鬻地于公歲輸賃直如公之數公義不受且併大中之子獨焉大本亦鬻所居於人公不能遏知其將遂轉徙預葺宅邊賃



屋以待其遷雖日費不供非所計虞氏姊既嫁生理不裕夫不能贍棄去不歸公迎以養積二十年姊竟卒公家既卒而其夫歸復舉其姊服用之餘以資之方析居時二妹尚幼皆育于公比嫁所携多公妻奩中物張氏妹既寡其子軒猶在襁褓携以適孟氏復寡遂携以歸於今十有三年軒初未知學今表表場屋間公少多病病疴至三月不差遇術士授以丹藥一服而愈故好聚方書且念田里間不能得良藥多以藥與人夏秋之間瘡癩流

行求藥者武相接藥材不足質錢以繼比年旱荒道路多凍餒時解衣推食以惠之平居靜坐不以家務撓懷遇風日清美杖策出游悠然有自得意自奉省約味不重衣不侈以是率其家人皆安於儉素晚得腫疾十餘年間再作而再愈嘉定辛未夏愈而復作投故劑不效前中秋一日而卒享年七十有二妻張氏有賢行子淵泳沂女二人長適胡旦次適陳岫皆名家子岫舉進士蓋赴廷對十年矣志不慊不屑也孫男元老恩郎孫女德良壽



娘皆幼凡公之爲好義而不顧其私達生而不狃於事彌縫於內而經理於外使力足以遂其志張氏與諸子有助焉宅西有園三十畝歲久蕪穢諸子旣長課僮僕芟夷而種藝之不數年脩竹茂樹嘉蔬美實收利十倍旣資用稍給乃相與謀留伯氏以養而納仲季於學泳三上名太學一在首選沂四舉于鄉名不下甲乙是歲擢進士第授平江府吳縣主簿其歸也公病已革視沂綠袍拜床下喜動顏色進食倍常日且屬家人治具咸謂公疾

瘳矣閱五日忽謂諸子曰吾時已至因索紙筆書偈辭意超詣衲子所不及屬後事以稱其家有無且曰人稀七十吾已過之方寸間寧復罣礙翼且親賓來者猶一一問姓名至午起坐若有所思已而曰何以坐爲復就枕亟視之則逝矣某嘗病去聖逾遠道俗分爲兩塗而不得其正其溺於俗者謂安分爲無能謂爲善爲無益終日營營自謂足以爲子孫計而專利以賈怨巧取以速陰禍有身之不能保者若公之爲善不爲利而有子自足以



興家其可以砥斯人之膏肓歟其爲道者以禮爲  
械以家爲累飄然遠引自謂足以了生死事而已  
私未克性地不明有形神將離而眷眷不能釋者  
若公之安行乎日用之常而臨死生大變卓然不  
惑其足以爲斯人之標準歟至其沉思於坐臥之  
際竟捨彼從此又與易簣而沒者同公所謂道非  
彼之道也淵等將以明年某月某日葬于所居大  
港鎮之西七里黃公山之原以其久托姻聯俾詮  
次行事某敬誦所聞曰信故受簡不辭

### 紀通判行述

君諱極字拯之姓紀氏世丹陽望族幼執爲文由  
鄉舉上名太學以遺澤出仕尉南劔州之劔浦境  
內劔潭多巨石屢碎行舟君至鳩民疏鑿舟得善  
濟郡守陳公器其能待遇有加禮境內山林蒼蔚  
盜所出沒前政緩縱劫掠公行君設方略得其尤  
者十六人餘悉奔散比君去無犯者醕賞改承務  
郎知平江府崑山縣丞時有沈三者夜殞于沈二  
十五之門邏者執沈二十五以告縣上之州獄具



輒畚異憲臺以屬君君察其寃曰是必其讐家所  
爲因緩其獄未幾得告者如君言寃賴以直邑並  
海籍海船得六十餘艘蓋憲臺具申密院以備許  
浦控扼者一日有將官戴克忠抵縣出制帥檄發  
所籍溫台海船扞禦江面戴趣發縣所籍舟應之  
君曰此吾邑之舟非溫台也吾所備者許浦非江  
面也與邑令合辭固拒帥以爲慢罪在不測君執  
愈堅事竟得伸民用不擾旣受代差知建康府溧  
水縣以憂不赴服闋知饒之樂平樂平邑大事叢

且當積廢之後君恬然不以劇自撓下車修鄉校  
訓生徒行鄉飲酒禮使知長幼之序興禮遜之教  
人以爲迂久而皆化之訟訴爲簡越明年自二月  
不雨至于秋八月君絜齊禱祠靡神不舉是歲旱  
甚惟樂平爲庶幾荒政方興流離踵至君親閱其  
人劑量其宜或贏糧以遺之或芟舍以居之食飢  
藥病不遺餘力又明年夏水驟至囊石以護隄編  
木以濟涉咸若素具民不病溺俄有蝗自西北來  
所至害稼過縣不下人以爲邑政所感過客有黃



機宜者請求弗遂怙勢陵轢至歐吏於廷君怒械  
之獄獄成解郡其所與偕坐徒流者十餘人時守  
非才橫賦捷出諸縣奉承惟謹君一無所徇曰吾  
寧得罪於郡無寧得罪於民守蓄怒將發會其論  
去人爲君喜君曰守去吾留幸不幸耳幸可常乎  
部使者真公行縣民羣起借留真公賢之榜于市  
曰知縣廉謹自將有恤民之心邑人撫其語播之  
聲詩其他有德政詩廉吏詩民風詩十可詩以至  
肖貌立祠刻石紀德非其感人之深何以至此君

前後歷官受知於人不可殫紀今丞相史公資政  
衛公皆嘗論薦樂平終更丞相遲其來將驟用之  
君自視已老欲卽安于外差通判廣德軍未上以  
疾卒實嘉定己卯正月四日年止七十有三官止  
承事郎娶張氏繼孫氏尚書覲之孫女女二人適  
張汝椿先卒男曰津習進士業明年庚辰二月有  
一日葬所居金壇縣岳陽村西原前葬孫夫人奉  
治命屬君從弟迪功郎監潭州南嶽廟續俾某述  
君行會某方悼亡不遑緒次則按監獄所哀謹而



書之昔歐陽有言治民如治病彼富醫之至人家僕馬鮮明進退有禮按醫書述病證聽之可愛然病兒服藥之無效則不如貧醫貧醫之至人家質實簡易與富醫略相反然病兒服藥曰已效矣則良醫也若君之爲邑無赫赫之政使人目動神駭而民愛之若此非歐陽所謂良醫歟其行也不鄙謂某宜有贈言某曰樂平巖邑今慈湖楊先生所治也而君居之惟廉惟勤則可以免全是二者其寡欲乎是故慈湖先生得效方也君曰唯久之還書于某曰君言旣效矣旣歸首及吾門曰敬謝三言之賜蓋君之樂於受言如此使究其所施其所可紀詎止見於樂平者哉故又述所聞於末庶後之傳循吏者或有取於斯云



漫塘文集卷之二十三





卷之四